



Galicia

MOBILIZACIÓNS NAS CIDADES E VILAS GALEGAS POLA CONTENCIÓN DOS PREZOS E A PROTECCIÓN DO EMPREGO

Redacción.- Miles de persoas participaron este mércores nas mobilizacións convocadas nas cidades e vilas galegas (A Coruña, Ferrol, Santiago, Lugo, Vigo, Ourense, Viveiro, Pontevedra e Arousa) para demandar do Goberno e da UE medidas que garantan xa a contención dos prezos e a protección do emprego.

As concentracións e manifestacións foron convocadas por UGT e CCOO, xunto coa Confederación Estatal de Asociacións de Veciños, as asociacións de autónomos UPTA e UATAE, a Unión de Consumidores de Galicia e diversas asociacións veciñais de diversas localidades para dicir basta xa ó deterioro das condicións de vida dos traballadores e traballadoras e da cidadanía en xeral.

Estas mobilizacións enmárcanse nun contexto no que a sociedade vive cunha profunda preocupación e gran malestar a escalada desbocada dos prezos. O pasado mes de febreiro a inflación acadou unha nova cifra histórica situándose no 7,6%, o seu nivel máis alto dende 1986. A tensión dos prezos da electricidade, gas, os carburantes e outras materias primas se está trasladando ó prezo do resto de bens e servizos que xa soben de xeito xeneralizado. As perspectivas non son boas, polo que toca actuar con celeridade.

O deterioro das condicións de vida das familias e persoas traballadoras e consumidoras, do tecido produtivo, e do conxunto da cidadanía, é moi palpable. Mes a mes as facturas da luz, a calefacción, a gasolina, os alimentos, a vivenda ou o transporte aumentan e detraen cada vez máis e máis recursos.

O conxunto da sociedade está sufrindo esta situación, pero é a poboación máis vulnerable, a que non chega a fin de mes ou o fai con dificultades, os que a padecen de forma máis cruel. A desigualdade e a pobreza eran problemas urxentes antes de que se iniciara esta escalada dos prezos. Nesta situación, estes problemas, que teñen rostro, que teñen nomes e apelidos, deben abordarse de xeito inaprazable.



Ó mesmo tempo, mentres o oligopolio das empresas multinacionais enerxéticas saca tallada neste escenario, e obtén beneficios históricos, millóns de consumidores e consumidoras e persoas usuarias, centos de miles de pequenas e medianas empresas e de autónomos e autónomas, ou os sectores produtivos de alto consumo enerxético, estanse vendo prexudicados por este aumento disparatado dos prezos.

Todo fai prever que a inxustificable guerra iniciada por Rusia coa invasión de Ucraína terá como consecuencia unha aceleración da inflación que pon en risco o acceso a bens e servizos esenciais, a recuperación económica e a creación de emprego intensificando os problemas de desigualdade e pobreza.

Ante este escenario, é urxente que as administracións actúen de forma contun-

dente. Por todo isto, as organizacións convocantes esixen que se cambie o irracional sistema marxinal de fixación do prezo da electricidade, controlando alzas desmesuradas, e que se tope o prezo máximo do MWh na poxa, porque non pode ser que os prezos do gas marquen o prezo da electricidade que se xera a través doutras tecnoloxías máis baratas. Que se poña fin ós beneficios extraordinarios e abusivos das empresas eléctricas e de hidrocarburos que venden produtos a prezos de futuras materias almacenadas e aprobar medidas con-

Continúa na páxina seguinte...

...vén da páxina anterior.

tra a especulación dos prezos dos produtos básicos, porque mentres a gran maioría sufrimos esta situación non pode ser que haxa quen saca tallada da desgraza.

Que se aceleren os investimentos para reducir a dependencia enerxética externa e fomenten o uso do transporte público, porque necesitamos gañar autonomía estratéxica no ámbito enerxético.

Protexer á cidadanía e ás familias, a solidariedade é a base do modelo social europeo, que debemos coidar e estender.

Apoiar ós sectores produtivos que máis enerxía consumen, porque debemos protexer a nosa industria, a nosa agricultura e gandería, a nosa pesca, o papel que xoga o transporte á hora de vertebrar a cadea de valor da actividade económica, e os empregos que xeran, que demostraron ser, entre outros, uns sectores absolutamente

estratéxicos para o noso futuro.

Activar o mecanismo RED para evitar despedimentos porque é necesario protexer o emprego, así como chegado o caso mecanismos similares para os autónomos e autónomas.

E, controlar os prezos dos alugueiros evitando que se revaloricen co IPC, porque ter unha vivenda na que poder vivir é unha necesidade, non un luxo.

PEPE ÁLVAREZ INTERVÉN O VINDEIRO XOVES EN SENDAS ASEMBLEAS NA CORUÑA E VIGO

Redacción.- O vindeiro día 31 UGT organiza sendas asembleas de delegados e delegadas na Coruña e en Vigo nas que está prevista a intervención do secretario xeral de UGT, Pepe Álvarez. Este analizará a situación actual que está a atravesar o país, explicará todos os acordos ratificados no marco do diálogo social e as previsións de traballo do Sindicato de cara ós vindeiros meses.

A asemblea da Coruña terá lugar ás 11.30 horas no Centro Ágora e a de Vigo celebrárase a partir das 18.00 horas no Auditorio Mar de Vigo.

Lembrar que estas asembleas enmárcanse nun contexto de visitas que o secretario xeral está a facer a todos os territorios nos que está a analizar a situación actual e as propostas de UGT ó respecto.

ASEMBLEA DE AFILIADAS E AFILIADOS
31 MARZO 11:30 HORAS
CENTRO ÁGORA
Av. Gramela, 17 A Coruña

ASEMBLEA DE AFILIADAS E AFILIADOS
31 MARZO 18:00 HORAS
Auditorio MAR DE VIGO
Av. da Beiramar, 59 Vigo

PEPE ÁLVAREZ
SECRETARIO XERAL DE UGT

UGT




O ENVÍO CON AXUDA HUMANITARIA, ORGANIZADO POR UGT EN COLABORACIÓN COAS FAMILIAS UCRAÍNAS ASENTADAS EN GALICIA, CHEGOU Á FRONTEIRA CON UCRAÍNA

Redacción.- O camión que saíu de Coles (Ourense) con axuda humanitaria, cuxo envío e recolección foi organizado por UGT-Galicia en colaboración coas familias ucraínas asentadas nesta Comunidade, chegou a Polonia, á fronteira con Ucraína, concretamente a Medyca, aínda que inicialmente tiña previsto facelo en Dolhobyczow non foi posible.

Así, en Medyca todo o material trasladouse a outro camión que o levará a centros sanitarios do oeste de Ucraína, grazas á axuda e colaboración do sindicato polaco OPZZ.

UGT-Galicia reitera o seu agradecemento a todas as persoas que colaboraron coas súas doazóns, ó Concello de Coles e ó Sindicato polaco OPZZ que a partir de agora encargárase da xestión do envío.

ГУМАНІТАРНА ДОПОМОГА
HUMANITARIAN AID



CONTINÚA A FOLGA NAS RESIDENCIAS PRIVADAS DA TERCEIRA IDADE POR UNHAS CONDICIÓN LABORAIS DIGNAS PARA O SECTOR

Esta semana convocáronse numerosas mobilizacións ás portas dos centros

Redacción.- Continúa a folga nas residencias da terceira idade de Galicia e centros de día para demandar un convenio xusto e digno xa para o sector. Lembrar que esta folga arrancou o día 18 e ó longo desta semana tiveron lugar numerosas mobilizacións ás portas dos centros de traballo afectados por este convenio, así como unha caravana de coches na Coruña.

Dende UGT Servizos Públicos Saúde explicaron que ó fixarse uns servizos mínimos do 100% a folga non afecta ó funcionamento dos centros, polo que se fixo unha recollida de sinaturas de adhesión que xa superan as 5.000.



VITRASA RECLAMA 19 MILLÓNS DE EUROS Á CIDADE DE VIGO E PRETENDE REDUCIR O SALARIO DOS SEUS TRABALLADORES NUN 30%

Redacción.- A pesar de que en xuño do ano 2020, en plena pandemia, a concesionaria do transporte urbano da cidade de Vigo aceptou renovar durante catro anos máis o servizo, sabendo que estabamos en plena pandemia por COVID e coñecedores de que o servizo estaría minguido polas restricións de ocupación así como redución temporal de usuarios derivado do teletraballo e os ERTES.

Con todo, parece que VITRASA non está disposta a deixar de percibir os seus obxectivos de beneficios, e é por iso que a pesar de percibir xa 5,5 millóns de euros a través do plan de reequilibrio ao que puideron optar as empresas prestadoras de servizos de transporte urbano, reclama ao Concello de Vigo máis de 13 millóns de euros. Se a xustiza dá-lle a razón, VITRASA embolsarase uns 19 millóns de euros.

Pero aquí non terminan as pretensións económicas da concesionaria, tamén iniciou un procedemento de “descolgue salarial” para reducir un 30% o salario dos seus traballadores, aumentar a xornada de traballo e reducir os seus custos en uniformidade. Todo iso sumado a constantes recortes no servizo



que levan aplicando desde hai tempo, como a redución de frecuencias.

Desde UGT consideramos un despropósito as intencións de VITRASA. Unha empresa que durante décadas obtivo elevados beneficios grazas á explotación do servizo de transporte urbano da cidade de Vigo e que agora pretende expoliar á cidade e ós traballadores. Pretende aludir a “causas de

forza maior” coma se non soubesen cando aceptaron a ampliación do contrato que o COVID xa formaba parte das nosas vidas.

“Se non están satisfeitos cos resultados económicos que perciben do servizo, na actualidade, que renuncien ó mesmo”. FeSMC-UGT-Pontevedra aclara que non está disposta a negociar “un atraco contra os traballadores e contra a cidade de Vigo”.

UGT ENSINO APOSTA POLA REDUCCIÓN DO RATEO POR AULA, ATA CHEGAR Ó TOPE DE 18, O QUE REDUNDARÍA NUNHA MELLORA DA CALIDADE DO ENSINO

O Sindicato rexeita que a evolución demográfica sexa aproveitada para o peche de centros e redución de profesorado

Redacción.- A análise realizada por UGT-SP Ensino sobre o comportamento demográfico dos últimos anos podería ter consecuencias nos centros educativos. Esta evolución tradúcese nunha redución de alumnado.

UGT Servicios Públicos Ensino advirte que esta conxuntura podería ser a excusa perfecta para que a Administración pretenda o peche de unidades sen contemplar outras posibilidades e sen buscar solucións a toda a gran problemática que isto traería consigo: redución de unidades, redución de profesorado, peche de centros (principalmente no rural onde se ven observando, cada vez máis, unha maior redución da cobertura do servizo educativo).

Por iso, UGT Ensino aposta e insta á Administración galega a que acometa unha liña de traballo diferente que pase por unha redución do rateo por aula para incidir así nunha mellora da calidade do ensino.

O Sindicato concreta as medidas que lle propón á Administración en:

- Unha redución progresiva, avan-

zando ano a ano desde o primeiro curso de infantil, do rateo alumno/aula e alumno/profesor a un número non superior a 18. Un número que debería verse reducido a valores máis baixos en situacións específicas, como por exemplo no rural, nas periferias das cidades ou en aulas con necesidades específicas.

- No caso de ser imposible evitar a perda de unidades, pedimos que se mantéña ó profesorado actual para paliar as necesidades de reforzo e de apoio.

Estas medidas, que por si soas non solucionan as eivas do sistema educativo, serían un gran salto na atención individualizada ó alumnado e na calidade do sistema cun incremento cero nos orzamentos, permitindo o mantemento do persoal docente actual.

Beneficios sobre o sistema educativo da redución de rateos

UGT Ensino expón os beneficios que introducen estas medidas na mellora da calidade do sistema educativo:

- A atención individualizada vese re-

flectida no grupo clase, en cada un dos alumnos e alumnas, igual que na atención ás familias (a menos alumnos, mellor atención).

- Mellora na formación académica, cun seguimento do proceso de aprendizaxe máis individual, atendendo ás características e necesidades específicas do alumnado e coa posibilidade dunha diagnose obxectiva das dificultades para atallar, canto antes, as mesmas.

- Maior calidade no traballo de aula con dinámicas e metodoloxías máis activas, participativas e con interaccións entre iguais e co profesorado. En definitiva, cara unha aprendizaxe máis significativa.

- Avaliacións realmente personalizadas e orientadas a unha evolución integral do alumnado.

En definitiva, a redución do rateo acararía un cambio de perspectiva, poñendo o foco do proceso educativo no alumnado e adaptando o sistema a todo o proceso de aprendizaxe con profesionais non desbordados, dedicando máis tempo ó que realmente importa: o alumnado e a mellora da calidade do ensino.

O CRECEMENTO ECONÓMICO PASA POR CONTROLAR PREZOS, SUBIR SALARIOS E CONTINUAR COAS REFORMAS

Redacción.- O crecemento anual do PIB no ano 2021 foi dun 5,1%, un bo dato, aínda que inferior ao que se prevía, segundo os datos definitivos da Contabilidade Nacional do cuarto trimestre de 2021, publicados polo INE. Con todo, as previsións de crecemento este ano (que antes de que comezase a guerra en Ucraína situábanse en preto do 6% de aumento do PIB) quedaron obsoletas por:

As continuas subidas de prezos dos produtos enerxéticos (o petróleo, o gas natural ou a electricidade) que se están trasladando ao resto de bens e servizos do IPC. O pasado día 23 a cidadanía manifestou o seu malestar nas rúas por esta situación, esixindo que se impoñan medidas capaces de frear esta escalada dos prezos e axudas para as persoas e entidades máis prexudicadas.

As sancións impostas a Rusia que están a xerar prexuízos tamén para a economía europea e española. Ademais de alimentar as subidas de prezos enerxéticos, poden causar un desabastecemento para as industrias españolas dalgúns insumos básicos (fundamentalmente minerais) e prexudicar a provisión dalgúns alimentos habituais na cesta da compra dos fogares.

Estes problemas prodúcense nunha situación delicada para a nosa economía, pois os salarios perderon poder de compra en 2021 e continúan igual en 2022. Por este motivo é necesario alcanzar un V Acordo para o Emprego e a Negociación Colectiva (AENC), que axude a minorar a incerteza actual que viven as empresas e, sobre todo, os traballadores e traballadoras.

UGT reclama intervir no mercado enerxético para asegurar produtos a un prezo

alcanzable para o peto medio. No último ano o prezo da electricidade e do gas natural multiplicouse por cinco, algo que non se pode permitir.

O sindicato demanda que se asignen e utilicen xa os recursos do Plan de Recuperación, Transformación e Resiliencia para reducir os efectos da guerra e conformar un novo crecemento máis equilibrado e sostible. Por iso, é necesario proseguir, sen demora, coas reformas e proxectos enmarcados neste Plan.

Fronte ás pretensións dos falcóns austericidas -que xa están a propoñer un endurecemento da política monetaria que afundiría as economías europeas- a solución pasa por liberar máis recursos de Europa e administralos eficazmente, para que o crecemento económico resintase o menos posible.

UGT REAFÍRMASE EN QUE A SOLUCIÓN Ó CONFLITO DO SAHARA OCCIDENTAL PASA POLO MARCO DA ONU

Redacción.- Ante a situación creada tras a comunicación por parte do Goberno de Marrocos dunha carta do presidente de España, a Unión Xeral de Traballadoras e Traballadores, UGT manifesta:

1) Máis aló dos longuísimos anos de loita do Pobo Saharauí, 47 anos despois, xeración tras xeración ve como se mantén a mesma situación que ao comezo do conflito. Decenas de miles de refuxiadas e refuxiados saharauís nos campos en Alxeria, e a colonización de Marrocos da antiga colonia española. Este é un feito que non se pode obviar por parte da comunidade internacional, e polo que é necesario atopar, no marco das Nacións Unidas, unha solución a este conflito, e sobre todo á situa-

ción que viven os saharauís fora do seu país

2) UGT quere lembrar ao Goberno os compromisos que, como Reino de España, ten adquiridos internacionalmente no concerto das Nacións Unidas e a comunidade internacional, que deben desembocar nun referendo onde o Pobo Saharauí decida o seu futuro.

3) Neste sentido, requirimos ao Goberno de España que calquera posición diferente prodúzase despois dun debate interno e un necesario consenso nacional, nunha cuestión que xera tantos sentimentos



na sociedade española.

4) Finalmente, reafirmámonos en que a solución do conflito pasa polas resolucións da Nacións Unidas no marco dun acordo multilateral.

A REFORMA LABORAL DEVOLVE Á NEGOCIACIÓN COLECTIVA O SEU PAPEL TRANSCENDENTAL NO MERCADO DE TRABAJO

Redacción.- O secretario confederal de UGT, Fernando Luján, entrevistou no FORO ARINSA, onde reclamou un “pacto social solidario” fronte aos efectos da guerra.

No mesmo, afirmou que “a reforma laboral devolve á Negociación Colectiva o seu papel transcendental nas relacións laborais e parte do equilibrio e coherencia que debe ter a mesma nun mundo do traballo en constante transformación. Esta reforma é un primeiro paso cara un modelo de relacións laborais adaptado aos tempos actuais, que debe ser máis democrático, socialmente xusto e máis redistributivo”.

“Pero non nos podemos quedar aquí”, sinalou. “É necesario reforzar os cambios operados pola reforma cun novo Acordo para o Emprego e a Negociación Colectiva (AENC) que impulse a renovación e actualización dos Convenios colectivos con novos criterios, orientacións e recomendacións vinculantes para os negociadores. Un acordo que, entre outras cuestións, estableza un incremento adecuado dos salarios que garanta o poder adquisitivo dos traballadores e traballadoras e con iso refórcese a recuperación económica e a creación de emprego”.

Neste sentido, lembrou que “a economía española segue crescendo, pero están a recortarse mes a mes as previsións de crecemento, debido ao impacto da guerra en Ucraína, que tras-

tornou as perspectivas existentes hai só unhas semanas. Antes pensábase que creceríamos en torno ao 5% ou máis. Agora xa se manexan previsións do 2 ao 4%. O principal impacto negativo da crise, que xa está a ter un efecto moi daniño, é o forte repunte da inflación, polo aumento dos custos enerxéticos e a súa esaxerada translación ás facturas. Xa o ano pasado o IPC terminou no 6,4%, mentres os salarios aumentaron un 1,7%, e en febreiro aumentou ata o 7,6%, mentres os incrementos salariais son do 2,26%”.

Por iso, reclamou un aumento dos salarios en consonancia co aumento do custo da vida. “O salario máis habitual para unha persoa traballadora é de pouco máis de 1.000 euros netos ao mes; o 11,8% das persoas traballadoras está en risco de pobreza; hai case dez millóns de persoas traballadoras ás que non lle chega o soldo cada mes; e unha de cada dez persoas en España vive en fogares que non poden manter a súa vivenda no inverno. Os salarios non poden asumir este custo, que sería ademais dramático para o conxunto da economía. Teñen que crecer á vez que se dinamizan as empresas e a economía en xeral”.



Necesitamos un pacto social solidario fronte aos efectos da guerra

Durante a súa intervención, Fernando Luján reclamou consensos e “un pacto social solidario fronte aos efectos da guerra, co fin de evitar que a incerteza paralice a actividade; que palíe os efectos da guerra e consolide unha recuperación que mellore as nosas capacidades produtivas de futuro e a calidade do emprego creado”.

Un pacto impulsado baixo o paraguas do diálogo social. “Os interlocutores sociais deberiamos participar activamente na negociación de todos os ámbitos afectados polas medidas e as reformas, non só do laboral: actividade sectorial, redución de prezos enerxéticos, modificacións impositivas, axudas sociais, etc.; e as medidas deben adoptarse con urxencia e ser de aplicación rápida e efectiva”.

2022 DEBE SER UN PUNTO DE INFLEXIÓN NA REDUCCIÓN DE BRECHAS E A RECUPERACIÓN DE DEREITOS

Redacción.- A vicesecretaria xeral de UGT, Cristina Antoñanzas, interveu na Xornada “Mulleres feministas para unha axenda sindicalista” onde analizou o impacto da reforma laboral nas mulleres e puxo en valor o papel do diálogo social e da concertación para mellorar as condicións laborais de miles de homes e mulleres.

Cristina Antoñanzas destacou a importancia de acordos como o da subida do Salario Mínimo Interprofesional -que se foi incrementando desde 2018 ata chegar este ano aos 1000 euros- xa que “supuxo unha redución de dous puntos da brecha salarial entre mulleres e homes, un dato moi positivo e moi importante que beneficia maioritariamente ás mulleres que son quen máis cobran o SMI e teñen os salarios máis baixos”.

Tamén resaltou a importancia dos dous reais decretos de igualdade, o 901 e o 902, onde se abordan os plans de igualdade e os rexistros retributivos, debido a que “nos van a dar información so-

bre o que realmente está a pasar nas empresas de máis de 50 traballadores no noso país: cantos homes e mulleres hai nas distintas categorías profesionais, realízan formación, collen excedencias e reducións de xornada e, se hai desigualdade ou mesmo discriminacións, poñer medidas para corrixilas e para diminuír a segregación profesional”.

Ademais, lembrou que o acordo de pensións, favorece especialmente ás mulleres, porque “consegue, entre outras cousas, recuperar o poder adquisitivo das pensións, eliminar o factor de sustentabilidade e acórdase unha subida maior das pensións mínimas, algo que beneficia fundamentalmente ás mulleres que son quen ten as pensións máis baixas”.

A loita contra a precariedade beneficia especialmente ás mulleres

Antoñanzas subliñou varios elemen-

tos relevantes do acordo da reforma laboral como, en primeiro lugar, que limita a contratación temporal e senta as bases para que o contrato xeneralizado sexa o indefinido, “algo que ten consecuencias positivas tanto en homes como en mulleres”. En segundo lugar, que recupera a ultraactividade dos convenios, o que mantén os soldos e, por tanto, o poder adquisitivo. En terceiro lugar, incidiu na modificación do artigo 42 do ET, sobre contratas e subcontratas, que supón que se aplique o convenio do sector, o que implica que os salarios se vexan revalorizados e, por último, a prevalencia do convenio do sector –que adoita ter mellores condicións- sobre o de empresa.

“Todas estas lexislacións acordadas melloran as condicións laborais e salariais e actúan sobre todo na precariedade, polo que terá un impacto directo sobre as mulleres”, engadiu, “o que será un punto de inflexión se, ademais, négóciense os plans de igualdade nas empresas e nas administracións públicas”.

LEI DE VIVENDA

É UNHA OCASIÓN HISTÓRICA PARA BLINDAR A FUNCIÓN SOCIAL QUE DESEMPEÑA A VIVIENDA

Redacción.- A Unión Xeral de Traballadoras e Traballadores mantivo reunións con distintos grupos parlamentarios –ERC, Unidas Podemos e PSOE- para explicar as emendas presentadas polo sindicato á Lei Estatal de Vivenda..

UGT considera que se trata dunha lei totalmente insuficiente para afrontar a grave emerxencia habitacional que arrasa o noso país, por iso xa participou no proceso de alegacións ao Anteproxecto de Lei polo Dereito á Vivenda.

É unha ocasión histórica para blindar a función social que desempeña a vivenda, polo que o sindicato reivindica que o texto final debe incorporar:

- Un marco de regulación do alugueiro común e efectivo, que permita reducir os prezos dos mesmos e equilíbralos aos ingresos da poboación.

- Un plan ambicioso para am-



pliar o parque público de vivendas, que garanta a asequibilidade da vivenda e alternativas habitacionais dignas.

- A prohibición expresa dos desafiuzamentos sen alternativa habitacional, cumprindo así coa carta de Dereitos Humanos.

- Medidas que aseguren as sub-

ministracións básicas a persoas en situación de vulnerabilidade, para que o acceso a unha vivenda teña lugar en condicións adecuadas.

Así o fará saber Ana Isabel Gracia, secretaria de Políticas Sociais e Vivenda de UGT, ó secretario xeral de Axenda Urbana e Vivenda na súa reunión do próximo luns, 28 de marzo.

É NECESARIO ACTUAR XA PARA PROTEXER E XESTIONAR A AUGA DE XEITO EFICIENTE E SOSTIBLE

Redacción.- O pasado 22 de marzo celebrouse o Día Mundial da auga, establecido por Nacións Unidas para destacar a importancia da auga doce como recurso, crear conciencia sobre os millóns de persoas que carecen de acceso a auga potable e que ten como obxectivo propiciar a adopción de medidas para afrontar a crise mundial da auga e apoiar a consecución do Obxectivo de Desenvolvemento Sostible 6: auga e saneamento para todos de aquí a 2030.

O tema deste ano é “Augas subterráneas, facer visible o invisible”, co que se quere dar visibilidade ás valiosas augas dos acuíferos que alimentan mananciais, ríos, lagos e humidais xa que a vida non sería posible sen elas. A maioría das zonas áridas do planeta dependen por completo deste recurso, que fornece unha gran proporción da auga que utilizamos. Así mesmo, son decisivas para o bo funcionamento dos ecosistemas, como os humidais e os ríos.

Por todo iso, debemos protexelas da sobreexplotación e a contaminación que actualmente as poñen en serio perigo e reivindicar a protección e a utilización das augas subterráneas de forma sostible para facer fronte ao cambio climático e satisfacer as necesidades dunha poboación en constante crecemento.



Un elemento esencial para o desenvolvemento sostible

España é un dos países que máis vai sufrir as consecuencias do cambio climático, algo que vai repercutir na cantidade e calidade de recursos hídricos dispoñibles. De feito, actualmente o 45% das masas subterráneas no noso país atópase en mal estado, tanto desde un punto de vista cuantitativo (debido á sobreexplotación) como químico (principalmente por causa da contaminación por nitratos e praguicidas).

Ademais, máis do 15% dos acuíferos sofren intrusión mariña, un proceso que afecta as masas de auga preto da zona litoral e que deteriora gravemente a súa ca-

lidade.

O sindicato lembra que a auga é un recurso esencial para a vida que debemos coidar e xestionar de maneira eficiente e sostible, por iso insta ó Goberno a acelerar as políticas e implantar as medidas necesarias para conseguir o bo estado de todas as masas de auga e dos ecosistemas asociados. A adaptación á nova realidade que produce o cambio climático, a xestión dos riscos producidos polos fenómenos meteorolóxicos extremos e a eficiencia no uso da auga son factores esenciais para cumprir os obxectivos marcados na Directiva Marco da auga e protexer as nosas prezadas augas subterráneas.

HAI QUE IMPULSAR O EMPREGO E MELLORAR AS CONDICIÓNS DAS PERSOAS TRABALLADORAS QUE COIDAN OS BOSQUES

Redacción.- UGT demanda plans para mellorar e coidar os nosos bosques e xestionalos de forma sostible, pois son esenciais para loitar contra a desertificación e o cambio climático. Esixe partidas orzamentarias suficientes, a aprobación da Lei Básica Estatal dos/as Axentes Forestais e Ambientais e o desenvolvemento da Lei para o Estatuto Básico do Bombeiro/a Forestal

Cada ano o mundo perde 10 millóns de hectáreas de bosques; unha extensión similar a Islandia e isto ocorre pola deforestación, a degradación e o cambio climático. O lema escollido este ano é “Bosques: consumo e produción sostibles”, para impulsar unha utilización responsable da madeira.

UGT reafirma o seu compromiso para protexer o planeta, os seus ecosistemas e a súa biodiversidade, non só para preservar o medio ambiente, senón tamén para contribuir a erradicar a pobreza e a fame no

mundo, e cumprir así co Obxectivo 15 de Desenvolvemento Sostible.

O sindicato considera vital establecer plans para mellorar e coidar os nosos bosques e xestionalos de forma sostible para loitar contra a desertificación e deter e investir a degradación das terras e da masa forestal. Hai que adoptar, con urxencia, medidas encamiñadas á restauración forestal e ao consumo e a produción sostibles. Ademais, a restauración dos nosos bosques permitirá impulsar as economías locais, o emprego verde e combater o despoboamento nos ámbitos rurais.

UGT insta a acabar coa situación precaria dos traballadores e traballadoras das actividades forestais e silvicultura e aprobar a Lei Básica Estatal dos e as Axentes Forestais e Ambientais. Trátase de fixar un marco normativo mínimo e común, para



reforzar as súas funcións, darlles garantías e acabar coa temporalidade.

Así mesmo, esixe o desenvolvemento da Lei para o Estatuto Básico do Bombeiro/a Forestal, para homoxeneizar as condicións laborais destes traballadores/as; e demanda incrementar o emprego dedicado á conservación e o coidado da natureza e os espazos protexidos no noso país.